

Carta na jnda we cwentaa nn'aⁿ tsjoom Corinto

Xmaⁿndye nn'aⁿ na cwila'yu' tsjoom Corinto

1 ¹ Mannco Pablo, cwiluiindyō apóstol, ts'aⁿ na maty'iom Jesucristo ts'iaaⁿ. Matseicwanoⁿya cartawaa ñequio Timoteo na m'aⁿ o' tmaaⁿ nn'aⁿ na macwji' Ty'oōts'om cwentaaⁿaⁿ na m'aⁿyo' tsjoom Corinto ndo' mati ndaa cha'tsondye nn'aⁿ na cwilayu' ñ'eⁿñê na m'aⁿ ts'ondaa Acaya. ² Nquii Tsotyaaya Ty'oōts'om ñequio Jesucristo na cwiluiñê na matsa'ntjoom jaa, quiana na nnto'ñoom'yo' naya na laxmaⁿna ñequio na tjaañomtiuu c'om'yo' jo ndaana.

Matseijoom' Ty'oōts'om jaa na wi' na cwiťjooⁿya

³ Cwila't'maaⁿndyô Ty'oōts'om na m'aaⁿ na wi' ts'oom jaa ndo' na matseijoom'm jaa. Jom cwiluiñê Tsotye Jesucristo na matsa'ntjom jaa. ⁴ Manquityeeⁿ mañequiaaⁿ na cwiñ'omt'maaⁿndyô n'oōⁿyâ nawi' na cwiwinooⁿyâ. Luaa' mach'eeⁿ cha' nla'xmaaⁿyâ na ndaa ñnequiaayâ na t'maⁿ n'om nn'aⁿ na cwiwinom nawi'. ⁵ Ee na matcuuti na cwilajomndyô ñequio Cristo nawi' na teinoom, juu nawi'ñeeⁿ matseijndaa'ñena' na t'maⁿti mañequiaaⁿ na cwiñ'omt'maaⁿndyô n'oōⁿyâ. ⁶ Ndo' nc'e na ljo', quia matseijaa'ñena' nawi' na cwiwinooⁿyâ, luaa' waa cha nntseijoom'na' 'o ndo' na nlui'n'maaⁿndyo' ee quia matseijoom' Ty'oōts'om jâ, mach'eeⁿ na ljo' cha mati nntseijoom'na' 'o nawi' na cwiwinom'yo' ndo' na nlui'n'maaⁿndyo' ndo' nc'e jo' ñequio na t'maⁿ n'om'yo' ndaa nla'quii n'om'yo' na cwiťjom'yo' nawi' cha'xeⁿ cwiwinooⁿyâ. ⁷ Ee tyeⁿ waa na cwicantyjaa' n'oōⁿyâ jo nnom Ty'oōts'om cantyja 'naⁿyo', ee manquiuyaayâ quia maleichuuwi'na' 'o cha'xeⁿ na cwiťjooⁿyâ, mati mañequiaaⁿ na cwiñ'omt't'maaⁿndyo' n'om'yo' cha'xeⁿ na mañequiaaⁿ na cwiñ'oⁿt't'maaⁿndyô n'oōⁿyâ.

⁸ 'O nn'aⁿya na cwila'yu'yo', l'ue n'oōⁿyâ na caliu'yo' cantyja 'naaⁿ nawi' na tyotseijaa'ñena' nacjooyâ xjeⁿ na tyom'aaⁿyâ ndyuua Asia. S'aana' na jeeⁿ jaa' juuna' hasta na ntycwii na m'aaⁿ n'oōⁿyâ na nlui'n'maaⁿndyô naquii' nawi'ñeeⁿ, ndo' na ljo' jla'tiuuyâ maxjeⁿ nntseicwjetona' jâ. ⁹ S'aana' nquiuyâ na matseijomna' jâ cha'na nn'aⁿ na jnda teijndaa' na mañejom na cwje. Tuii na ljo' cha ca'moⁿyana' ndaayâ na ñequii'cheⁿ c'oōⁿyâ na quit'maⁿ n'oōⁿyâ Ty'oōts'om na mañequiaa na cwitando'xco nn'aⁿ na jnda tja, meiⁿ tanc'oōⁿyâ na ntyjaa' n'oōⁿyâ chiuu cwilaxmaaⁿ nncjooyâ. ¹⁰ Jnda seicandyaañê jâ nawi' t'maⁿñeeⁿ. Ndo' ndicwaⁿ matseicandyaañê jâ. Jo' chii jom ntyjaa'tyeⁿ n'oōⁿyâ na mati xuee na wjaatina' nntseicandyaañetyeeⁿ jâ, ¹¹ xeⁿ 'o cwiťjindei'yo' jâ na cwilaneiⁿyo' nnoom cantyja 'naaⁿyâ. Ee quia

majndye nn'aⁿ cwitjeii'na ncueeyâ jo nnoom, nnts'aana' na majndyendyeti nn'aⁿ ñnequiana na quianl'uuaⁿaⁿ na matio'naaⁿñê jâ.

Waa na seitsaaⁿñena' na tîcjaa Pablo Corinto

¹² Waa cwii nnom na mañequiaana' na neiiⁿyâ cantyja 'naaⁿ juuna' na juu na m'aaⁿya n'ooⁿyâ matsona' na cwitsaam'aaⁿyâ quii'ntaaⁿ nn'aⁿ cha'xjeⁿ macaⁿna' na c'oom ts'aⁿ na jnda tqueⁿ Ty'oⁿots'om na cwiluiiñe cwentaaⁿaⁿ na lju' ts'om ndo' mat'maⁿticheⁿ cwilaxmaaⁿyâ na ljo' jo ndaa 'yo' nc'e juu naya na matseixmaaⁿ, nchii cwe' na jndo' n'ooⁿ ncjooyâ. ¹³ Naquii' joo cartas na cwila'cwanooⁿyâ na m'aⁿyo' tomti cwit'mooⁿ joona' cha'xjeⁿ ñ'oom na cwiwiljeii nacjoona', ndo' cha'xjeⁿ na cwila'naⁿyo' ndo' na cwila'noⁿyo' ljo' cwila'candii joona'. Ntyjaa'ya cwii ts'oⁿya na nncue'ntyjo na candaⁿ nla'noⁿya'yo' cantyja 'naaⁿyâ, ¹⁴ cha meiiⁿ na cwe' cwantindyo cwila'noⁿyo' cantyja 'naaⁿyâ je', saa juu xuee quia na nncwjee'nnda' Ta Jesús na cwila't'maaⁿndyo, 'o ndaa nla't'maaⁿndyo' jom cantyja 'naaⁿyâ cha'xjeⁿ jâ nla't'maaⁿndyô jom cantyja 'naⁿyo'.

¹⁵ Nc'e na luaa' waa na ntyjaa'ya cwii ts'oⁿya cantyja 'naⁿyo', seitiuuya na wendii' nncwinooⁿ na m'aⁿyo' na nty'iaⁿya 'o cha we ndii' ñnequiaana' na neiⁿyo' na nty'iaⁿyo' ja, ¹⁶ ee seitiuuya na nty'iaⁿya 'o na mawinooⁿya na majo ts'ondaa Macedonia, ndo' na nty'iannda'a 'o quia na ndyolcwa'a na nnaaⁿya jo' jo', ndo' na ljo' 'o ndaa nnteijndei'yo' ja na jojotyâ na nncuaⁿ ndyuaa Judea. ¹⁷ Ndo' na luaa' seijndaa'ndyo, ¿aa mach'eena' nquiu'yo' na cwe' na s'aato na seijndaa'ndyo na luaa'? ¿Aa cwitjei'yo' cwentaa na mats'aa cha'na mach'ee ts'aⁿ na m'aaⁿ cantyja 'naaⁿ tsjoomnancue quia matsjoo "majo'ndyo" cwii ñ'oom saa ndanquia cwiwitquioo' na ma'moⁿna' na "nchii jo'", ndo' xeⁿ matsjoo na nchii jo' cwii ñ'oom, saa ndanquia ma'moⁿna' na majo'ndyo juuna'? ¹⁸ Saa macwji'yuu'ñe Ty'oⁿots'om na nchii la'xmaaⁿyâ nn'aⁿ na mañejuu xjeⁿ cwil'uuyâ ndaa'yo' na waa na l'aayâ saa tical'aayâ. ¹⁹ Juu Silvano ñ'eⁿ Timoteo ñ'eeⁿna ñ'eⁿndyo na tyoñequiaayâ ñ'oom naya ndaa'yo' cantyja 'naaⁿ Jesucristo Jnda Ty'oⁿots'om. Ñ'oom'ñeeⁿ nchii we ndii' tseixmaⁿna', na waa xjeⁿ na majo'ndyo ndo' waa xjeⁿ na nchii jo'ndyo juuna'. Cantyja 'naaⁿ jom, ñequii'cheⁿ tseixmaⁿ ñ'oom'ñeeⁿ ñ'oom na mayuu'. ²⁰ Ee cantyja 'naaⁿ jom, cha'tso ñ'oom na tso Ty'oⁿots'om na nnts'aaⁿ, laxmaⁿ joona' na majo'ndyo nc'e Cristo. Ndo' na ljo', quia cwila't'maaⁿndyo Ty'oⁿots'om, cwil'uuya Amén cantyja 'naaⁿ Cristo Jesús. ²¹ Ee ñequii'cheⁿ mañequiaa Ty'oⁿots'om na 'o ndo' jâ cwiljoo'ndyotyaaⁿya cantyja 'naaⁿ Cristo ndo' jnda tqueeⁿ na cwiluiindyô na lju' n'ooⁿya. ²² Ndo' cha m'moⁿna' na cwiluiindyô cwentaaⁿaⁿ, jnda tquiaaⁿ Espíritu Santo quii' n'ooⁿya, cwii na matseicandiina' na nnto'ñooⁿya cha'tso na matseijndaa'ñê.

²³ Macaⁿa nnom Ty'oots'om na cwji'yuu'ñê cantyja 'naⁿya na matseinaⁿya ñ'oom na mayuu'. Tîcjo tsjom'yo' quia na seijndaa'ndyo na ncjo jo' ee na wi' ts'ooⁿya 'o ee xeⁿ tjo na m'aⁿyo' jndei'na na nntseitia'a 'o. ²⁴ Ee nchii ñe'quaaⁿyâ xjeⁿ 'o cantyja na cwila'yuy'yo' ee 'o xcweti waa na cwila'yuy'ya n'om'yo' ñ'eⁿ Ty'oots'om. Saa nc'e na ñe'cateijndeiia'yâ 'o na c'om'yo' na neiiⁿti n'om'yo'.

2 ¹ Jo' chii seijndaa'ndyo na maxjeⁿ tîcjo na m'aⁿyo', tints'aa na nntseichjoo'na' n'om'yo'. ² Ee xeⁿ cantyja 'naaⁿ na ljo', nnts'aa na nntseichjoo'na' n'om'yo' ndo' na ljo' ntjom'yo', ¿ñeeⁿ nñequiaa na neiⁿya? Macanda 'o ee xeⁿ na maxjeⁿ tjo je' jnda s'aa cwii nnom na seichjoo'na' n'om'yo'. ³ Cwe' jo' na seiljeiya ñ'oom'ñeeⁿ na seicwanoⁿya na m'aⁿyo' ee tiñe'cjonty'ia 'o na nl'a'yo' na chjoo' ts'ooⁿ ee matsona' na 'o nñequia'yo' na neiⁿya. ⁴ Ee sei'ndaa'na' ntyjiiya quia seiljeiya carta'ñeeⁿ, s'aana' na jeeⁿ jnda ntyjiiya hasta ty'iooya. Nchii seiljeiya juuna' na catseichjoo'na' n'om'yo' saa cha cala'noⁿyo' na juu na jeeⁿ wi' ts'ooⁿya 'o jeeⁿ t'maⁿ tseixmaⁿna'.

Cala't'maⁿ n'omna ts'aⁿ na seitjooñe

⁵ Saa xeⁿ m'aaⁿ ts'aⁿ na s'aa na chjoo' n'om nn'aⁿ, nchii cwe' tomti ja na tquiaaⁿ na chjoo' ts'ooⁿ, s'aaⁿ na ljo' ñ'eⁿ cha'tsondyo' 'o, meiⁿ nchii cwe' na mawinoⁿa na matsjoo na ljo'. ⁶ Saa je' malei'tyeⁿ jnda tuii chiuu na majndyendyo'ti'yo' jla'jndaa'ndyo' na catioom cantyja na seitjooñê. ⁷ Je' macaⁿna' na cala't'maⁿ n'om'yo' jom ndo' quia'yo' na t'maⁿ ts'oom, tints'aana' na juu na m'aaⁿ na chjoo' ts'oom na seitjooñê nncjan'oomna' jom na tacantyjaa' ts'oom Ty'oots'om. ⁸ Jo' chii macaⁿa ndaa'yo' na cat'moⁿyo' na jnda nquiuy'yo' jom. ⁹ Seiljeiya carta'ñeeⁿ na seicwanoⁿya na m'aⁿyo' cha nleitquiao' aa nla'canda'yo' ñ'oom na maquaⁿya ndaa'yo'. ¹⁰ Ee meiⁿcwi'ñeeⁿcheⁿ ts'aⁿ na cwila't'maⁿ n'om'yo' mati ja matseit'maⁿ ts'ooⁿ tsaⁿñeeⁿ, ndo' meiⁿnquia 'ñeeⁿ na jnda seit'maⁿ ts'ooⁿ, jo nnom Cristo mats'aa na ljo' na cateijndeiina' 'o, ¹¹ cha tincwantjom Satanás jaa ee manquiuyuaya chiuu mayaaⁿaⁿ.

Waa na seitsaaⁿñena' Pablo tsjoom Troas

¹² Quia na tjo tsjoom Troas na nñequiaaya ñ'oom cantyja 'naaⁿ Cristo ndaa nn'aⁿ tsjoom'ñeeⁿ, t'maⁿ tju'naaⁿñena' na nndi'ntjoⁿya nnoom jo' jo', ¹³ saa meiiⁿ na ljo' tîleiquiaana' na ya ntyjii ee tîc'oomñe ti'nn'aaⁿya Tito. Nc'e na ljo', tsjooya ndaa naⁿñeeⁿ majoya, jluii'a na m'aⁿna, jndyoondyeyuya ñjaaⁿ ts'ondaa Macedonia.

Cwicandaa cwitantjooⁿya nc'e na m'aaⁿya nacje 'naaⁿ Cristo

¹⁴ Matseit'maaⁿndyo Ty'oots'om na jeeⁿ quianl'uaaⁿaⁿ. Ee nc'e na m'aaⁿyâ nacje 'naaⁿ Cristo, jo' na meiⁿyucheⁿ na cwitsaayâ, ñequii'cheⁿ nqueⁿ wjaachom jâ na cwicandaa na nnaⁿndyô meiⁿljo'cheⁿ

na cwiťjooⁿyâ. Jo' chii ñequii'cheⁿ mawil'uee'ñê jâ na 'oondye nn'aⁿ ñ'oom naya 'naaⁿ'aⁿ. Juu ts'iaaⁿmeiⁿ matseijomna' juuna' cha'cwijom na maju'na' jndye cachi ndaana. ¹⁵ Ee jaa nn'aⁿ na cwilayuu'a ñ'eⁿ Cristo matseijomna' cha'cwijom tsioom suu na mañequiaaⁿ nnom Ty'oots'om na cwiť'oom'na' quii'ntaaⁿ nn'aⁿ na cwicalui'n'maaⁿndye ndo' mati nn'aⁿ na 'ootsuundyena. ¹⁶ Jo ndaaⁿ nn'aⁿ na 'ootsuundy laxmaaⁿya cha'cwijom cwii jndye na matseicwjeena' joona saa jo ndaaⁿ nn'aⁿ na cwilui'n'maaⁿndye laxmaaⁿya cha'cwijom cwii jndye na mañequiaana' na cwita'ndo' añmaaⁿna. Meiⁿ tjaa 'ñeeⁿ c'oom na cwe' cantyja 'naaⁿ' nquii na nleinaaⁿ na nnts'aa ts'iaaⁿmeiⁿ'. ¹⁷ Ee m'aⁿ nn'aⁿ na cwiť'mooⁿ ñ'oom' Ty'oots'om cwe' cha ndaaⁿ nnta'ntjomna cantyja 'naaⁿ'na'. Saa jâ na cwiluiindyô apóstoles, ñequio na xcwee'ya n'ooⁿyâ cwiñe'quiaayâ ñ'oom'm ndo' cwiluiindyô nn'aⁿ na cwindye'ntjomtyeⁿ nnom Cristo.

Ñ'oom na tijoom cachuii' na matseijndaa'ñe Ty'oots'om

3 ¹ Quia cwil'uuyâ na luaa', ¿aa m'aaⁿ' n'om'yo' na cwiťooⁿnda'â na cwila't'maaⁿndyo cheⁿncjooyâ cantyja 'naaⁿ' ts'iaaⁿ na cwil'aayâ? Oo ¿aa cwila'tiuu'yo' na maca'na' na nntsañ'ooⁿyâ cartas na cwilue nt'omcheⁿ nn'aⁿ na jeeⁿ candaⁿ' ts'iaaⁿ na cwil'aayâ? Oo ¿aa nntaaⁿyâ na quia'yo' carta na nndu'yo' na jeeⁿ candaⁿ' ts'iaaⁿ cwil'aayâ? Nt'omcheⁿ nn'aⁿ luaa' cwil'ana. ² Saa mancjo'ti'yo' cwiluiindyô' cha'cwijom cwii tsom na teiljeiina' naquii' n'ooⁿyâ na ma'moⁿ'na' ndaaⁿ nn'aⁿ na cwijaacañjoom' ts'iaaⁿ 'naaⁿ' Ty'oots'om na cwilui quii'ntaaⁿ'yo'. Nc'e cantyja 'naaⁿ' juuna' ndaaⁿ nljeii ts'aⁿ chiuu waa ts'iaaⁿ na tyots'aa quii'ntaaⁿ'yo' ndo' ndaaⁿ ndii na jla'ljo'yo' Jesucristo. ³ Cwiwitquioo'ya na 'o laxmaⁿ'yo' cwii carta na nquii Cristo seiljeiⁿ cantyja 'naaⁿ' ts'iaaⁿ na jnda macwil'aayâ quii'ntaaⁿ'yo', na nchii teiljeii juuna' ñequio ndaantom, saa ñequio Espíritu Santo, meiⁿ nchii nacjoo' lcaa'ljo' saa teiljeiina' naquii' n'om'yo'.

⁴ Manquiuuyaayâ na luaa' waa ee cwićantyjaa' n'ooⁿyâ Ty'oots'om nc'e Cristo. ⁵ Meiⁿ nchii ncjooyâ waa cwii nnom na laxmaaⁿyâ na ndaaⁿ nl'uuyâ na jeeⁿ cwijaacañjoom' ts'iaaⁿ 'naaⁿ'aⁿ na cwil'aayâ, nquii Ty'oots'om mañequiaaⁿ na cwijaacañjoom' cwil'aayâ juuna'. ⁶ Nqueⁿ jnda ty'ioom ts'iaaⁿ jâ na cwicandaⁿ cwindyaⁿntjoⁿyâ cantyja 'naaⁿ' ñ'oom na tijoom cachuii' na mañequiaana' na nlui'n'maaⁿndye nn'aⁿ. Juu ñ'oom'ñeeⁿ waa najndeina' na matseijndaa'ñena' na cwita'ndo'xco añmaaⁿ nn'aⁿ nc'e Espíritu Santo. Nchii maqueⁿ'na' xjeⁿ nn'aⁿ cha'xjeⁿ mach'ee ljeii naqui. Ee ljeii'ñeeⁿ matseijndaa'ñena' na cwje nn'aⁿ.

⁷ Juu ljeii na tqeⁿ Moisés, teiljeiina' cjoo' lcaa' ljo'. Ñeseixmaⁿ'na' na caxueena' hasta tyoch'eena' na caxuee nnom Moisés, meiⁿ leicandaⁿ nty'iaa nn'aⁿ Israel nnoom ndo' juu na caxuee nnoom cheⁿndyocheⁿ tjanduu'na'. Juu ljeii'ñeeⁿ na seijndaa'ñena' na cwiwje nn'aⁿ, tyjee'na' ñequio na caxuee na cwiluiñe Ty'oots'om, ⁸ nc'e na luaa' tyotseixmaⁿ

juu na caxuee'ñeeⁿ, cwanti t'maⁿti tseixmaⁿ ñ'oom na tijoom cachuii' na cwito'ñoⁿya na matseijndaa'ñe Espíritu Santo. ⁹ Ee xeⁿ juu ñ'oom na seijndaa'ñena' na nnt'uiityeⁿna' nn'aⁿ tyotseixmaⁿna' na caxuee na cwiluiiñe Ty'oots'om, quia jo' juu ñ'oom na maqueeⁿ jaa na tjaa jnaⁿ jlaxmaaⁿya, t'maⁿti na caxuee na tseixmaⁿna', nchiiti ñ'oom na tqueeⁿjñeeⁿ. ¹⁰ Meiiⁿ t'maⁿ na caxuee tyotseixmaⁿ ljeii na tqueⁿ Moisés, saa juu ñ'oom na maqueeⁿ Ty'oots'om jaa na tjaa jnaⁿ laxmaaⁿya, t'maⁿticheⁿ nacaxuee na tseixmaⁿna'. ¹¹ Jo' chii xeⁿ juu ñ'oom'ñeeⁿ na ticwiyoⁿ meiiⁿ t'maⁿ tyotseixmaⁿna' na caxuee na cwiluiiñe Ty'oots'om, saa je' juu ñ'oom na cwiljotypeⁿ t'maⁿticheⁿ na caxuee na cwiluiiñe tseixmaⁿna'.

¹² Nc'e juu ñ'oomxcowaa' mañequiaana' na cwicantyjaa' n'ooⁿyâ, jo' jo' na cwilanaaⁿyâ juuna' ndaa nn'aⁿ ñequio na t'maⁿya n'ooⁿyâ. ¹³ Meiⁿ tiquil'aayâ cha'na tyoch'ee Moisés na tyotseicataaⁿaⁿ nnoom ñequio liaa cha juu na caxuee nnoom na ñeya tjantycwiina', titquioo' juuna' ndaa nn'aⁿ Israel. ¹⁴ Saa naⁿñeeⁿ tîcala'nqⁿna na luaa' tyoch'eeⁿ ee xjeⁿ je'cheⁿ quia cwila'naaⁿna ñ'oom tquiee'ñeeⁿ na tquiaa Moisés ndaana waa cwii na cha'cwijom liaa na matseicu'na' na nla'nqⁿna na juu jo' macanda maquindyona' quia na matseyu' ts'aⁿ ñequio Cristo. ¹⁵ Ee xjeⁿ je'cheⁿ, quia na cwila'naaⁿna ñ'oom na tyoñequiaa Moisés, ticala'nqⁿna juuna'. Matseijomna' cha'cwijom na ta' na nla'nqⁿna juuna'. ¹⁶ Saa quia cwilcwe' ts'om ts'aⁿ jnaaⁿ na nntioñe l'o nquii na cwiluiiñe na matsa'ntjom, matseicanaa'ñena' na nntsei'nqⁿ ñ'oom'ñeeⁿ. ¹⁷ Ee manquii na cwiluiiñe na matsa'ntjom jaa, manquiityeeⁿ cwiluiiñe Espíritu, ndo' meiⁿquiayuucheⁿ na m'aaⁿ Espíritu na cwiluiiñe, jo' cwindyaandye nn'aⁿ. ¹⁸ Jo' chii cha'tsondyo jaa nc'e na ticata' ndaaya ñequio cwii liaa, matseijomna' jaa cha'cwijom tsjo'jnom na maju'na' na caxuee na cwiluiiñe Jesús na matsa'ntjoom jaa, ndo' 'io ndi 'io matseijomtina' jaa cha'na nqueⁿ na jaawijndyeti matseit'maaⁿñena' jom na juu jo' cwinaⁿna' cantyja 'naaⁿ nqueⁿ na matsa'ntjoom jaa, na cwiluiiñe Espíritu.

Macanda Jesucristo cwiluiiñe na matsa'ntjoom

4 ¹ Jo' chii nc'e na m'aaⁿ Ty'oots'om na wi' ts'oom jâ na mañequiaaⁿ na cwilaxmaaⁿyâ ts'iaaⁿmeiiⁿ na jeeⁿ cajndana', tica'ndyaanc'uaa'ndyô na cwil'aayâ juuna'. ² Ndo' meiⁿquia na jeeⁿ jnaaⁿ na cwil'a nn'aⁿ na cwe' nty'iu, jnda tjei'ndyô cantyja 'naaⁿna'. Meiⁿ tjaa'naⁿ cwii nnom na cwil'aayâ cha nñequiu'nn'aⁿna' nn'aⁿ. Meiⁿ tiquilachuii'â ljo' na ma'mqⁿ ñ'oom' Ty'oots'om. Ñequii'cheⁿ cwilanaaⁿyâ ñ'oom na mayuu' ndo' nc'e na ljo' cwiñe'quiandyon'aaⁿyâ jo nnoom meiⁿljo'cheⁿ na m'aaⁿ n'om nn'aⁿ cantyja 'naaⁿyâ. ³ Ee juu ñ'oom naya na cwiñe'quiaayâ, xeⁿ tseixmaⁿna' cha'cwijom cwii 'naⁿ na matseicu'na' ndaana, macanda ndaa nn'aⁿ na 'ootsuundye tseixmaⁿna'

na ljo'. ⁴ Ee nn'aⁿ tsjoomnancue, cwe' nc'e na tyoola'yu'na, jo' chii juu na cwiluiiñe Ty'o^ots'om cwentaana matseicoom'm na nla'noⁿ'na, jo' na tileiqueⁿ na cwenta na juu ñ'oom naya cantyja 'naaⁿ Cristo na jeeⁿ cajnda tseixmaⁿ na jom jluiiñê nquii Ty'o^ots'om. ⁵ Quia cwiñequiaayâ ñ'oom, nchii cwilanaaⁿyâ chiuu laxmaaⁿ ncjooyâ, saa cwilanaaⁿyâ na Jesucristo cwiluiiñê na catsa'ntjoom ndo' na luaa', jâ cwiluiindyô na cwindya'ntjooⁿyâ ndaa'yo' nc'e na jnda nquiuyuâ Jesús. ⁶ Ee nquii Ty'o^ots'om na sa'ntjoom na cwixueeñe yuu na jaañe, manquityeeⁿ jnda s'aaⁿ na seixueeñena' naquii' n'o^oyâ, cha cantyja 'naaⁿ juu na caxuee'ñeeⁿ ndaaⁿ nnta'jnaaⁿâ na t'maⁿ cwiluiiñê nc'e mañejuu na xuee'ñeeⁿ matseixueeñena' nnom Jesucristo.

Jaa laxmaaⁿya cha'cwijom ncuaa ts'ocachu

⁷ Juu nayawaañe na jeeⁿ jndana', la'xmaaⁿyâ juuna' naquii' seii'â na joo seii'â matseijomna' cha'cwijom ncuaa ts'ocachu. Luaa' waa cha nleitquioo'ya na cwicandaⁿ cwil'aayâ ts'iaaⁿmeiiⁿ nc'e Ty'o^ots'om mañequiaaⁿ na jndaayâ, meiⁿ nchii ncjooyâ waa na cwila'xmaaⁿyâ. ⁸ Jo' chii meiⁿ na jndye nnom na ñe'catseic'o^o'na' jâ, saa cwinaⁿndyô, meiⁿ niom na ñe'canchjena' jâ, saa ndicwaⁿ m'aaⁿyâ na quit'maⁿ n'o^oyâ Ty'o^ots'om. ⁹ Jndye nn'aⁿ cwintyjo jâ saa tyoo'ndii Ty'o^ots'om jâ. Cwitmeiiⁿndyena jâ nnom tyuaa, saa ndicwaⁿ m'aaⁿtyaayâ. ¹⁰ Meiⁿyuucheⁿ na cwitsaayâ, ñequio seii'â nmeiiⁿ cwitjooⁿyâ na ñe'catseicwjeena' jâ cha'xeⁿ seicuee'na' Ta Jesús. Luaa' waa cha mati m'moⁿ'na' na la'xmaaⁿyâ juu na wando'xcoom. ¹¹ Ee yocheⁿ na cwitandoo^o'â, 'io ndi 'io ñe'catseicwjeena' jâ nc'e na m'aaⁿyâ cantyja 'naaⁿ Jesús, cha mati cantyja 'naaⁿyâ ñequio seii'â nleitquioo' na la'xmaaⁿyâ juu na wando'xcoom. ¹² Quia jo' meiⁿ wi' cwitjooⁿyâ na ñe'catseicwjeena' jâ saa cantyja 'naaⁿ jo', 'o la'xmaⁿ'yo' na cwitandoo'yo' ñ'eⁿ Ty'o^ots'om.

¹³ Naquii' ñ'oom' Ty'o^ots'om na teiljeii matsona': "Matseyu'a ñ'eⁿ Ty'o^ots'om, jo' chii macwji'yuu'ndyô cantyja 'naaⁿ'aⁿ." Mati jâ cwilayu'ya n'o^oyâ ñ'eⁿñê ndo' cwilanaaⁿyâ cantyja 'naaⁿ jo'. ¹⁴ Ee manquiuuyaayâ na nquii Ty'o^ots'om na tquiaaⁿ na tando'xco Jesús jnda na tue', nnts'aa na nntandoo'xcooyâ ñ'eⁿñê, ndo' ñecwii tmaaⁿ nncjachom 'o ñ'eⁿndyô jâ yuu na m'aaⁿ. ¹⁵ Cha'tso nawi'meiⁿ na cwiwinooⁿyâ ts'iaaⁿ'na' na cateijndeina' 'o, cha na majndye nn'aⁿ nnto'ñoomna naya na matseixmaⁿ Ty'o^ots'om, ndo' na ljo' jndye joona nñequiana na quianl'uaaⁿ'aⁿ cha catseit'maaⁿñena' jom.

¹⁶ Jo' chii tica'ndyenc'uaa'ndyô ee meiⁿ na jaaju'cjena' seii'â saa 'io ndi 'io cwiwiteiiⁿxco naquii' n'o^oyâ. ¹⁷ Ee joo nawi' na cwitjooⁿyâ je' ñequio seii'â, cwe' chjootindyo joona', tiyocheⁿ cwiwinooⁿyâ joona' ndo' cantyja 'naaⁿ jo' cwicandaaya cwii na tintycwii na matseit'maaⁿñena' jaa na juu jo' t'maⁿ'ti ndo' jndati tseixmaⁿ'na', nchiiti cha'tso nmeiⁿ. ¹⁸ Ee

tiquitjaa'ndyô cwentá na wi' na tquioo' na cwitjoo'yâ. Cwiquaa'yâ cwentá joo 'na' na tileicanty'iaaya, ee joo na cwinty'iaayâ, ticaljotype'na', saa joo na titquioo' m'aa' ndo' m'aa'.

Nnto'ñoo'ya seii'a na xco

5 ¹ Seii'a nmeii' la'xma'na' cha'cwijom cwii w'aa na cwe' cwantindyo chu waana'. Ndo' manquiuyuá xe' nntyuii' juuna' jnda seijndaa'ñe Ty'oots'om w'aa na xcona' jo cañoom'luee na ticantycwii na waana', na nchii nn'a' l'a juuna'. ² Ee mayuu' yoché na cwitandoo'a ñequio seii'a nmeii'ñe, cwila'ncjoo'ndyo ee quee' n'oo'ya na nnc'oo'ya w'aaxco na waana' cañoom'luee, ³ ee na nla'xmaa'ya juuna', nntseijomna' jaa cha'cwijom ts'a' na cwee liaa', nchii cha'na ts'a' na ñecasei'ñe. ⁴ Seii'a nmeii' na laxma'na' cha'cwijom w'aa yuu na cwic'aa'ya, jaawi'ndaa'na', jo' cwilancjoo'ndyo ndo' matsei'ndaa'na' nquiuyuá ee nchii cwe' na ñeca'ndyaaya seii'a na n'ndiina' jaa cha'cwijom ñecantsei'ndyo, saa nc'e na ñe'cwaa'a seii'a na xcona', cha juu na laxmaa'ya na cwiwi'ndaa' ndo' na 'oowje cwitsuuñ'e'na' nc'e na laxmaa'ya na ticantycwii na cwitandoo'a. ⁵ Nquii Ty'oots'om jnda seijndaa'ñe na nluii na luaa', ndo' cha na m'mo'na' na nntseicandaa'ñe juuna', jnda tquiaa' Espíritu Santo naquii' n'oo'ya, cwii na ma'mo'na' na cwiljotype' ñ'oom na jnda tsoom.

⁶ Jo' chii cwiñ'omt'maa'ndyo n'oo'ya na yoché na ndicwa' tandoo'a ñequio seii'a nmeii', tyooto'ñoo'ya w'aaya, ñecatsona' na tic'oo'ya ñequio nque' na cwiluiiñe na matsa'ntjoom jaa. ⁷ Ee cwitsam'aa'tyaaya nc'e na cwila'yu'ya cwii n'oo'ya ñ'e'ñe, nchii nc'e na cwinty'iaandaaya jom. ⁸ Saa m'aa'ya na quit'ma' n'oo'ya Ta Jesús ndo' nl'ueyaya n'oo'ya na tacatandoo'tyaaya ñequio seii'a nmeii' cha ndaa nntandoo'a yuu na m'aa'. ⁹ Jo' chii cha'tso na cha'tso na cwil'aaya, cwijoo' n'oo'ya na ñequii'che' cal'aaya yuu na cwijaawee'ntyjee', meii' na cwitsam'aa'tyaaya ñ'e' seii'a nmeii', oo meii' na jnda 'ndyaaya juuna'. ¹⁰ Ee cha'tsondyo nncwintyja'a jo nnom Cristo na nncu'xee' jaa, cha cwii cwiindyó nnto'ñoo'ya cantyati na jnda ñel'aa xje' na ñet'oo'ya ñequio seii'a, aa na maty'iomyana' ndo' aa na tia.

Cwiljoya ts'om Ty'oots'om ñ'e'ndyo nc'e Cristo

¹¹ Nc'e na nntu'xe'ndye nn'a', jo' chii cwijoo' n'oo'yâ na quiandye nn'a' cantyja 'naa'a'. Nquii Ty'oots'om ntyjiijndaa'ñe chiuu n'oo'yâ ndo' ntyjaa' n'oo'yâ na mati 'o. ¹² Tinc'oom' n'om'yo' na ñe'calat'maa'ndyo che'ncjooyâ ndaa'yo'. Já cwe' cwiñequiaayâ na wanaa' na c'om'yo' na jnda nquiuyó' já, cha ndaa nla'lcwe'yo' ñ'oom ndaa nn'a' na cwilas'andye cantyja chiuu na cwiwitquioo', nchii cantyja chiuu tseixma' ts'a' naquii' ts'om. ¹³ Ee meii' cwilue nn'a' na jnda teintjei'ndyô, luaa' laxmaa'yâ nc'e Ty'oots'om, ndo' xe' laxmaa'yâ ts'a'

na yaa', luaa' waa cha' cateijndeiina' 'o. ¹⁴ Juu na m'aaⁿ Cristo na candya' ts'oom já cwiluiñena' cwii na matsa'ntjomna' ee nquiuyaayâ na tueeⁿeⁿ cwentaa cha'tsondye nn'aⁿ, jo' chii cha'tsondyo cwiluiindyô l'oo. ¹⁵ Tueeⁿeⁿ cwentaa cha'tsondye nn'aⁿ cha joo nn'aⁿ na cwitando'na tic'omtina cantyja na l'ue n'om nquieena, saa catando'na cantyja 'naaⁿ nqueⁿ na tueeⁿeⁿ ndo' tando'xcoom cwentana. ¹⁶ Jo' chii je' tacotjeii'â cwenta chiuu tseixmaⁿ ts'aⁿ cha'xjeⁿ nn'aⁿ tsjoomnancue cwitjeii'na cwenta chiuu tseixmaⁿ cwii x'iaana. Tyowaa cwii tiempo maluaa' tyotjeii'â cwenta chiuu tseixmaⁿ Cristo saa je' tacol'aayâ na ljo'. ¹⁷ Jo' chii ts'aⁿ na matseitjoom'na' juu ñequio Cristo, cwiluiñe ts'aⁿ na jnda tuiñe xco. Cha'tso na tijo'ndyo na ñeseixmaaⁿ jnda teinom, cha'tso cantyja 'naaⁿaⁿ laxmaⁿ xcona'.

¹⁸ Nquii Ty'oots'om mach'eeⁿ ts'iaaⁿmeiⁿ, majom maqueeⁿ jaa na cwiljoya ts'oom ñ'eⁿndyo nc'e Cristo ndo' maty'ioom ts'iaaⁿ jaa na quiandye nn'aⁿ na caljoya ts'oom ñ'eⁿndyena. ¹⁹ Luaa matsona': Cwiljoya ts'om Ty'oots'om ñ'eⁿ nn'aⁿ nc'e Cristo, meiⁿ ticwjaa'ñê cwentana la'xmaⁿna jnaⁿ, ndo' ty'ioom ts'iaaⁿ ndaayâ na ñnequiaayâ ñ'oom ndaaⁿ nn'aⁿ na cwiljoya ts'oom ñ'eⁿndyena. ²⁰ Je' cwiluiindyô nn'aⁿ na cwila'candii 'o ñ'oom na matseicwanom Cristo na m'aⁿ'yo'. Maty'iomna' na nquii Ty'oots'om matseity'oonê ndaa'yo' ñequio ñ'omndyuaayâ. Jo' chii ñequio xuee' Cristo cwila'ty'oondyô ndaa'yo' na caljoya n'om'yo' ñ'eⁿ Ty'oots'om. ²¹ Cristo meiⁿcwii jnaⁿ tîcatseixmaaⁿ, saa nc'e na candya' ts'om Ty'oots'om jaa, jo' na s'aa na matseixmaaⁿ jnaⁿ cha jaa na matseitjoom'na' ñ'eⁿñê ndaaⁿ nla'xmaaⁿya cantyja na maty'iomyana' cha'xjeⁿ na macaⁿna'.

6 ¹ Nc'e na cwiluiindyô nn'aⁿ na cwil'a ts'iaaⁿ ñ'eⁿ Ty'oots'om, cwil'aayâ ty'oo ndaa'yo' na til'a'yo' na ticato'ñoom'yo' naya na matseixmaaⁿ. ² Ee naquii' ñ'oom' Ty'oots'om na teiljeii matsoom:

Jndiia ñ'oom na tsu' nooⁿ juu xjeⁿ na tjawee' ts'ooⁿ ñ'eⁿndyu'.

Teijndeiya 'u juu xuee na seijndaa'ndyo na nncwji'n'maaⁿndyo 'u. Cala'noⁿ'yo' ñ'oomwaa' na tso Ty'oots'om. Je' cwiwee' xjeⁿ na ñecateijneiⁿ 'o. Je' xcwe xjeⁿ na jeeⁿ ñe'cwji'n'maaⁿñê 'o.

³ Meiⁿcwii tiquil'aayaayâ cha catseilcwe'na' ts'om ts'aⁿ, tints'aana' na tia ñ'oom cwiwineiⁿ cantyja 'naaⁿ ts'iaaⁿ na cwil'aayâ. ⁴ Na cha'tso na cwil'aayâ cwijoo'ya n'ooⁿyâ na m'moⁿ'na' na cwiluiindyô nn'aⁿ na cwindye'ntjomtyeⁿ nnom Ty'oots'om, na jndye nnom nawi' na cwiwinooⁿyâ, m'aaⁿyâ na t'maⁿya n'ooⁿyâ, ñequio na matseitjoona' na nleil'uee'ndyô ndo' cantyja 'naaⁿ cwii cwii nnom najndei'na' na mat'uiina' já, ⁵ cwitjooⁿyâ na cwicachooⁿâ cwil'a nn'aⁿ, ndo' na cwitioomna já l'aancjo. Quia waa tacwaxua ndyueena cjooyâ. Ndo' mati m'aaⁿyâ na jndei'na' na cwil'aayâ ts'iaaⁿ cha'na meiⁿquiandyo ts'aⁿ na m'aaⁿ moso. Ndo' na macwji'na' tsaⁿtsjom ndaayâ ndo' mati cwitjooⁿyâ na matseitjoona' ljo' nntquiaayâ, ⁶ mati cwit'mooⁿyâ na cwiluiindyô

nn'aⁿ na cwindye'ntjomtyeⁿ nnom Ty'o^oots'om cantyja 'naaⁿ na lju' na cwitsaam'aaⁿyâ ndo' mati na cwila'n^oâ ñ'oom na mayuu' ndo' na m'aaⁿyâ na nioom' n'o^oyâ ñequio nn'aⁿ, ndo' na ya nn'aⁿndyô quio joona, ma'm^ona' na ljo' nc'e m'aaⁿ Espíritu Santo ñ'eⁿndyô, ndo' cantyja 'naaⁿ na xcwee'ya n'o^oyâ na wi' n'o^oyâ nn'aⁿ, ⁷ ma'm^ona' na ljo' nc'e xcwee' n'o^oya na cwiñequiaayâ ñ'oom na mayuu', cwiluui na ljo' ñequio najndei na matseixmaⁿ Ty'o^oots'om. Ntyjaya ndo' ntyjatymaⁿ cwiwil'uee'ndyô l'ots'iaaⁿ na maty'iomyana'. ⁸ Quia waa cwila't'maaⁿndye nn'aⁿ jâ, quia waa ticuee' n'omna jâ. Quia waa cwiluena na ya nn'aⁿndyô, ndo' quia waa cwiluena na tia nn'aⁿndyô. Quia waa cwiluena na cantundyô meiiⁿ ñ'oom na mayuu' cwilanaaⁿyâ. ⁹ Waa xjeⁿ na cwil'a nn'aⁿ ñ'eⁿndyô cha'cwijom la'xmaaⁿya nn'aⁿ na tjaa 'ñeeⁿ cwajnaaⁿ meiiⁿ jndye nn'aⁿ m'aⁿ na cwita'jnaaⁿna jâ. Waa xjeⁿ teincuu' m'aaⁿya na ñe'cala'cwjeena jâ saa ndicwaⁿ cwitandoo'a, cwicachoo'â saa tyoowjaayâ. ¹⁰ Meiiⁿ na maniom na matseichjoo'na' n'o^oyâ saa m'aaⁿyâ na neiiⁿyâ. Meiiⁿ na jneeⁿndyô saa cantyja 'naaⁿyâ maque'na' jndye nn'aⁿ na tyandyena jo nnom Ty'o^oots'om. Meiiⁿ na meiⁿchjoo tjaa na cwileiñ'o^oyâ, saa cha'tsoñ'eⁿ la'xmaⁿna' cwentaayâ. ¹¹ 'O nn'aⁿya na cwila'yuyoyo' na m'aⁿyoyo' tsjoom Corinto, tyoonquio'nn'aaⁿyâ 'o, ndyeyu cwilanaaⁿyâ ndaa'yoyo'. Tyoola'cuu'â ndaa'yoyo' chiuu m'aaⁿ n'o^oyâ ñ'eⁿndyoyo'. ¹² Meiⁿcwii tyooch'eena' na wandii' n'o^oyâ ñ'eⁿndyoyo'. Saa xeⁿ laxmaⁿyoyo' na wandii' n'om'yoyo' ñ'eⁿndyô quia jo' ncjo'yoyo' waa chiuu cantyja 'naⁿyoyo'. ¹³ Cha'xjeⁿ nquii tquie ts'aⁿ matseineiⁿ ndaa ntseinda, mats'aa ty'oo ndaa'yoyo', c'om'yoyo' na jnda nquiu'yoyo' ja cha'xjeⁿ jnda ntyjiia 'o.

Cwiluiindyô wa'ts'om 'naaⁿ Ty'o^oots'om na wando'

¹⁴ Tilax'iaa'ndyoyo' ñequio nn'aⁿ na tyoolayu', ee xeⁿ luaa' cwil'a'yoyo' tixotseiljoyuna' 'o ñ'eⁿndyena. Ee nn'aⁿ na cwil'a yuu na maty'iomyana' xondaã nlajomndyena ñequio juu na matseixmaⁿ natia. Meiⁿ nn'aⁿ na cwila'jomndye ñequio na cwiluiiñe naxuee xondaã nnla'x'iaa'ndye ñequio na tseixmaⁿ najaaⁿ. ¹⁵ Ee xotseitjoom'na Cristo ñequio Satanás. Ndo' mati ts'aⁿ na matseyu', xondaã nntseitjoom'na' jom ñequio cwii ts'aⁿ na tyootseyu'. ¹⁶ Nn'aⁿ na cwiluiindyô waa' Ty'o^oots'om, ¿aa nndaã nleijom ñ'oom joona ñequio nn'aⁿ na cwila't'maaⁿndye 'naⁿ na nchii jom cwiluiindyena'? Ee 'o cwiluiindyô wats'om 'naaⁿ Ty'o^oots'om na wando', cha'xjeⁿ tsoom:

Ja nnc'o^o naquii' n'omna, ndo' nnconooⁿya quii'ntaaⁿna.

Ja nntseixmaⁿya Ty'o^oots'om cwentaana,
ndo' joona nluindyena tmaaⁿ cwentaya.

¹⁷ Ndo' na luaa' waa, mati waa cwiicheⁿ ñ'oom'm na teiljeii na matso nqueⁿ na cwiluiiñe na matsa'ntjoom jaa. Matsoom:

'O je', calui'yoyo' quii'ntaaⁿ nn'aⁿ na tia nn'aⁿndye.

Catjei'ndyo' cantyja ljo' laxmaⁿ naⁿñeeⁿ.

Meiⁿ tant'ue'yo' 'naⁿ na tilju' tseixmaⁿ.

Xeⁿ nmeiⁿ nla'nda'yo' quia jo' nloñoⁿya 'o.

¹⁸ Ndo' nntseixmaⁿya Tsotye'yo'.

Ndo' mati 'o nla'xmaⁿ'yo' ntseindaaya na naⁿnom ndo' naⁿlcu.

Nmeiⁿ ñ'oom na tso nqueⁿ na matseixmaaⁿ na catsa'ntjoom jaa na tjacantyja na cwiluiñê najneiⁿ.

7 ¹ 'O nn'aⁿya na jeeⁿ wi' ts'ooⁿya, nc'e na la'xmaaⁿya ñ'oommeiⁿ na jnda tso Ty'oots'om na nnts'aaⁿ, jo' chii macaⁿna' na cala'lju'ndyo cantyja 'naaⁿ cha'tso na matseicw'aa'ñena' seii'a ñequio n'ooⁿya. Ndo' ñequio na nquiaaya na nc'oom na ticjawee' ntyjeeⁿ ñ'eⁿndyo, candaⁿ quiandyoñ'aaⁿ cha'tso na l'ue ts'oom.

Neiiⁿ Pablo na joo nn'aⁿ Corinto tíoⁿ n'omna ñ'eⁿñê

² Cwa quiandyo' na nntseitjoom'nnda'na' jâ ñ'eⁿndyo'. Jâ meiⁿjom ndii' tyool'aayâ nawi'ndyô ñ'eⁿndyo'. Meiⁿ tyoola'tjoondyô nnom meiⁿcwiindyo' 'o, meiⁿ na ññe'nquio'nn'aaⁿyâ 'o. ³ Saa nchii luaa' matsjoo na matseitia'a 'o ee jnda ñetsjoo na m'aⁿ'yo' naquii' ts'ooⁿya meiⁿ na nntandoo'â oo meiⁿ na nncwjaayâ ñ'eⁿndyo'. ⁴ T'maⁿ waa na t'maⁿ ts'ooⁿya 'o ndo' jeeⁿ neiⁿya 'o. Quii'ntaaⁿ cha'tso nawi' na cwiwinooⁿyâ tileicantycwii na m'aaⁿya na neiⁿya.

⁵ Ee cantyati na squiaayâ ts'oondaa Macedonia, tileiquiaana' na nnta'jndyaayâ ee lomañjaaⁿ jndye nnom na tyoco'wi'na' jâ, tyolawendye nn'aⁿ nacjooyâ ndo' macaty'uaya. ⁶ Saa nquii Ty'oots'om na mañequiaaⁿ na t'maⁿ n'om nn'aⁿ na m'aⁿ na chjoo' n'om, manquiiityeeⁿ tquiaaⁿ na t'maⁿ n'ooⁿyâ na tyjee'cañoom Tito jâ, ⁷ ee nchii macandâ cwe' na tyje'cañoom jâ, saa mati nc'e na tquia'yo' na neiiⁿeⁿ na tyom'aaⁿ ñ'eⁿndyo'. Ee seicañeeⁿ na jeeⁿ ñe'canty'ia'yo' ja, ndo' na tia nquiu'yo' ljo' na tuui quii' ntaaⁿ'yo'. Mati tsoom na tyojoo' n'om'yo' na nla'canda'yo' ñ'oom na seijndo'a n'om'yo'. Ndo' quia na jndiia na ljo', t'maⁿti tío na neiⁿya.

⁸ Ee meiⁿ na juu carta'ñeeⁿ seichjoo'na' n'om'yo', saa tico'tiana' ntyjii na ljo' s'aa ee jnda ljeiya na cwe' chjootindyo s'aana' na tco'tiana' nquiu'yo', ⁹ saa je' neiⁿya na seicwanoⁿya juuna' meiⁿ nchii na seichjoo'na' n'om'yo' na tquiaana' na neiⁿya, tquiaana' na neiⁿya na 'o tíoⁿ n'om'yo', na jo' jo' tjawee' ntyjii Ty'oots'om. Ndo' na luaa' tqioo'ya na nchii s'aaya cwii nnom na seilcwe'tya'na' 'o. ¹⁰ Ee quia na mañequiaa Ty'oots'om na matseichjoo'na' ts'om ts'aⁿ cwii na ticatsa'ntjomna' na mach'ee, luaa' mach'eeⁿ cha nlcwe' ts'om ts'aⁿ, cha nndaⁿ nncwji'n'maaⁿñê juu. Ndo' na luaa' mach'eeⁿ meiⁿ xocatso tsaⁿñeeⁿ na cwe' ts'iaaⁿ'ndyo na lcwe' ts'om. Saa nn'aⁿ na tyoola'yu' meiⁿ jnaⁿ na laxmaⁿna mach'eena' na chjoo' n'omna, maxjeⁿ tiñe'calcwe' n'omna. Ndo' cwe' jnaaⁿ jo' cwitsuundye añmaaⁿna.

¹¹ Queⁿyo' cwenta juu na tyom'aⁿyo' na chjoo' n'om'yo' teil'ueeñe Ty'oots'om. Juuna' s'aana' na tqeⁿndyo' na jla'jndaa'ndyo'. S'aana' na jla'lloo'ndyo' na luaa' s'aa tsaⁿñeeⁿ ndo' t'om'yo' na nquia'yo' xeⁿ chiuu nnts'aa Ty'oots'om ñ'eⁿndyo'. Mati s'aana' na ñe'canty'ia'yo' ja ndo' tqeⁿtyeⁿyo' na cjameintyjeeⁿeⁿ natia na s'aaⁿ.

¹² Quia jo' nchii cwe' tomti cantyja 'naaⁿ juu ts'aⁿ na seitjoñe, jo' na seiljeiya carta'ñeeⁿ, meiiⁿ nchii cwe' cantyja 'naaⁿ tsotyeenⁿ na jlui'jnaaⁿñe, saa seiljeiya juuna' cha' jo nnom Ty'oots'om nntseica'moⁿyana' na 'o jnda nquiu'yo' ja. ¹³ Ndo' na maljeiya na ljo', tquiaana' na ty'oⁿt'maaⁿndyo ts'oⁿ.

Majndeiticheⁿ quia na ljeiya na jla'ñ'oom'ndyo' Tito ts'iaaⁿ na tjaaⁿ na m'aⁿyo'. Ndo' na teijndei'yo' jom mati tquiaana' na neiⁿya nc'e s'aana' ntyjeeⁿ cha'cwijom na m'aaⁿ waⁿaⁿ. ¹⁴ Meiⁿ ticalui'jnaaⁿndyo quia na tjei's'aya 'o nnoom, na tsjooya na ntyjiiyaya na 'o nla'candaa'ndyo' ñ'oom na nntsoom, ndo' cha'xeⁿ jlui'yuu' cha'tso ñ'oom na jnda tjei'yuu'ndyo ndaa'yo', mati cha'tso ñ'oom na jnda l'uuyâ nnoom cantyja 'naⁿyo', jnda jlui'yuu'na'. ¹⁵ Ndo' nc'e na luaa', jndati ntyjeeⁿ 'o na majaañjoom' ts'oom na tyola'candaa'ndyo' ñ'oom na tsoom ndaa'yo', na ñequio na tyotue'ndyo'cje'yo' ndo' na cwicatyue' neiⁿyo'.

¹⁶ Jeeⁿ ndyaa' neiⁿya na candaa'ya ndaaⁿ nnc'oⁿt'maaⁿndyo ts'oⁿya ñ'eⁿndyo'.

S'om na nnteijndeina' nc'iaana na cwilayu'

8 ¹ Ndo' je' 'o nn'aaⁿyâ na cwila'yuy'yo', l'ue n'oⁿya na caliu'yo' cantyja 'naaⁿ naya na mach'ee Ty'oots'om ñequio ntmaaⁿ nn'aⁿ na macwjeeⁿeⁿ cwentaaⁿaⁿ na m'aⁿna ts'oⁿndaa Macedonia. ² Ee joona meiiⁿ jndye nnom nawi' na jaa'na' na cwiwinomna, m'aⁿna na neiiⁿna, ndo' meiiⁿ na jeeⁿ nty'iaandyena saa ndoo' ntyjii ts'aⁿ na tyandyena na tinc'uaa' tquiana s'om na nnteijndeina nn'aⁿ na matseitjoona'. ³ Macwji'yuu'ndyo cantyja 'naaⁿna ee tquiana ñequio na xcwee' n'omna, ndo' meiⁿ titomndyo tquiana ee maxjeⁿ ljo' l'ue n'omna. ⁴ Jndye ty'oo tyol'ana ndaayâ na nnta'ncueeyâ na nla'jomndyena na nnteijndeina nn'aaⁿya na cwila'yuy' Jerusalén. ⁵ Meiⁿ nchii l'ana cha'xeⁿ na jla'tiuuyâ, ee tquiandyejndyeena naquii' l'o Ta Jesús na caluii ñ'eⁿndyena yuu na macaⁿna', nda jo' jlueña ndaayâ na cal'uuyâ chiuu l'ue ts'om Ty'oots'om na cal'ana. ⁶ Nc'e na luaa' waa, l'aayâ ty'oo nnom Tito na catseicandaa'ñe ts'iaaⁿ nayawaañe na to'jñeeⁿ quii'ntaaⁿyo' na cwila'tjom'yo' s'om'ñeeⁿ. ⁷ Ee 'o jndye nnom cwiwitquiao' na 'o ma'naⁿti'yo' nchiiti nt'omcheⁿ nn'aⁿ na cwila'yuy': 'O t'maⁿti waa na cwila'yuy'ya n'om'yo' ñ'eⁿ Ty'oots'om. 'O jndyendyo' ya cwit'moⁿyo' ñ'oom'm ndaaⁿ nt'omcheⁿ. 'O xcweti cwila'noⁿyo' cantyja 'naaⁿaⁿ. 'O queeⁿti n'om'yo' na cwindye'ntjom'yo' nnoom. 'O jnda nquiu'yo' ñ'eⁿndyô. Nc'e na nmeiⁿ la'xmaⁿyo', jo' chii matsona' na mati

nncwinom'yo' nt'omcheⁿ nn'aⁿ na cwilayu' na t'maaⁿti nñequia'yo' na nnteijndeina' nc'iaa'yo' na cwila'yu'.

⁸ Na matsjoo ñ'oomwaa', nchii na matsa'ntjoⁿya 'o chiuu cal'a'yo'. Saa ñequii'cheⁿ l'ue ts'ooⁿ na caliu'yo' na nt'omcheⁿ nn'aⁿ queeⁿ n'omna na cwil'ana na ljo'. Ndo' na nla'jomndyo' m'moⁿyana' na xcwee' n'om'yo' na jnda nquiu'yo' naⁿñeeⁿ. ⁹ Ee macwila'noⁿyo' cantyja 'naaⁿ juu naya na matseixmaⁿ Ta Jesucristo. Ee meiiⁿ ñet'oom na tjacantyja na tyañê cañoom'luee, saa nc'e na jeeⁿ candya' ts'oom 'o s'aañe cheⁿnqueⁿ na nty'iaa'ñeeⁿ. Ndo' na ljo' s'aaⁿ maqueeⁿ 'o na cwiluiindyoy' na tyandyoy' jo nnom Ty'ooots'om.

¹⁰ Matsjoo ndaa'yo' chiuu waa na m'aaⁿ ts'ooⁿ cantyja 'naaⁿ ñ'oomwaa' cha cateijndeina' 'o. Ee 'o machu'cheⁿ jla'tiuu'yo' na ñe'cateijndeiyoy' nn'aⁿ Jerusalén ndo' xjeⁿñeeⁿ jla'catoyoy' na nla'tjom'yo' s'om. ¹¹ Jo' chii cjoo' n'om'yo' na nla'candaa'ndyo' ñ'oomwaa', ee tyom'aⁿyo' na queeⁿ n'om'yo' na nñequia'yo' s'om na nnteijndeina' nn'aⁿ na cwila'yu' jo' jo', cha'xjeⁿ na s'aana' naquii' n'om'yo' quia jo', jo' quia'yo' cantyhati na cwileiñ'om'yo'. ¹² Ee xeⁿ na mayuu' na l'ue ts'om ts'aⁿ na nñequiaa cwentaa' Ty'ooots'om, jom maco'ñoom na maleiñ'oom ts'aⁿ, nchii macaaⁿ na ticuaa l'o ts'aⁿ.

¹³ Meiⁿ nchii matsjoo na cateijndeiyoy' nt'omcheⁿ nn'aⁿ cha na catseitjoona' na cwileil'uee'ndyo'. ¹⁴ Maty'iomna' na tjoom' cateijndeii nn'aⁿ nc'iaana na cwila'yu'. Je' 'o na majndaa'ti m'aⁿyo' maxjeⁿ ndaa nnteijndeiyoy' nn'aⁿ Jerusalén 'naⁿ na matseitjoona' joona, cha cwiicheⁿ ndii' quia na ndaa nliu joona mati ndaa nnteijndeina yuu na matseitjoona' 'o, ndo' na luaa' nl'a'yo', ñe'cwii xjeⁿ nnteijndeina' 'o ñ'eⁿndye joona, ¹⁵ cha'xjeⁿ matso ñ'oom' Ty'ooots'om na teiljeii: "Ts'aⁿ na majndye maná tyocañeⁿ, tîtseicwaljoo'na', ndo' mati juu ts'aⁿ na tijndye tyocañeⁿ, tîcatseitjoona' jom."

Tito ñequio nn'aⁿ na cwiteijndeii jom

¹⁶ Mañequiaya na quianl'uaa' Ty'ooots'om cantyja 'naaⁿ nn'aaⁿya Tito. Ee cha'xjeⁿ na m'aaⁿ ts'ooⁿ chiuu nnteijndeitya 'o, maluaa' m'aaⁿ ts'oom cantyja 'naⁿyo'. ¹⁷ Ee neiiⁿeⁿ quia tsjooya nnoom na cjaacanty'iaa'nnaaⁿaⁿ 'o. Ndo' nc'e na queeⁿ ts'oom na ñe'cateijneiⁿ 'o, jo' chii mawjaacando'nnaaⁿaⁿ 'o ee mati jom l'ue ts'oom na ljo'.

¹⁸ Ñ'eⁿ Tito cwijñooⁿyâ cwiicheⁿ nn'aaⁿya na matseyu'. Quii'ntaaⁿ ntmaaⁿ nn'aⁿ na macwji' Ty'ooots'om cwentaaⁿaⁿ waa ñ'oom na jeeⁿ ya mañequiaa tsaⁿñeeⁿ ñ'oom naya 'naaⁿ Ty'ooots'om. ¹⁹ Ndo' nchii macandâ na luaa' waa. Joo ntmaaⁿ nn'aⁿ na macwji' Ty'ooots'om cwentaaⁿaⁿ ndyuaameiⁿñe, jnda ty'ioomna ts'iaaⁿ jom, na nncjaañ'eeⁿ ñ'eⁿndyô quia nntsaayâ Jerusalén na nntsaaca'ndyaayâ s'om na cwil'a'yo' naya naⁿñeeⁿ, na cantyja 'naaⁿ jo' matseit'maaⁿñena' Ty'ooots'om ndo' m'moⁿna' na ñe'cateijndeiiya naⁿñeeⁿ. ²⁰ We ndyeendyô

ñecwi nntsaayâ Jerusalén cha tjaa 'ñeeⁿ nntseitiuu na tis'a cwil'aayâ ñ'eⁿ s'om'ñeeⁿ. ²¹ Ee nchii macandâ jo nnom Ty'ooots'om cwiqueⁿndyô na nl'aayâ yuu na maty'iomyana', saa mati jo ndaa nn'aⁿ.

²² Ñequiondye joona cwila'cwanooⁿyâ cwiicheⁿ nn'aaⁿya na jndye nnom na mach'eeⁿ ma'moⁿna' ndaayâ na jeeⁿ queeⁿ ts'oom ts'iaaⁿ 'naaⁿ Ty'ooots'om ndo' je' majndeiticheⁿ na luaa' ee cantyja 'naⁿyo' mañ'oom t'maaⁿñê ts'oom. ²³ Xeⁿ m'aaⁿ ts'aⁿ na mawax'ee 'ñeeⁿ cwiluiñê Tito, candu'yo' na cwiluiñê x'iaya. Matseijomñê ñ'eⁿndyô na cwindye'ntjooⁿyâ ndaa'yo'. Ndo' xeⁿ cwita'x'ee nn'aⁿ cantyja 'naaⁿ nt'omcheⁿ naⁿm'aⁿ candu'yo' na ntmaaⁿ nn'aⁿ na macwji' Ty'ooots'om cwentaaⁿaⁿ cwiññoomna naⁿm'aⁿ ts'iaaⁿ 'naaⁿaⁿ ndo' matseit'maaⁿñena' Cristo cantyja 'naaⁿna. ²⁴ Jo' chii cat'moⁿndyeyu'yo' na mayuu'cheⁿ jnda nqui'u'yo' naⁿm'aⁿ cha caliu ticwii cwii tmaaⁿ nn'aⁿ na macwji' Ty'ooots'om cwentaaⁿaⁿ. Ee na nl'a'yo' na ljo', cha'tsondye nn'aⁿ na cwila'yu' nliuna na ticantundyô na cwiñjeii'â ñ'oom na jeeⁿ ya cwila'candaⁿndyo'.

Nla'tjomna s'om na nl'ana naya nc'iaana na cwila'yu'

9 ¹ Cantyja 'naaⁿ na nla'tjom'yo' s'om na nl'a'yo' naya nn'aⁿ na macwji' Ty'ooots'om cwentaaⁿaⁿ, meiⁿ tacaⁿna' na nntseiljeityaya ñ'oommeiⁿ. ² Ntyjiyaya na queeⁿ n'om'yo' na nntei'jndei'yo'. Jnda ñetjeii's'aya 'o ndaa nn'aⁿ ñjaaⁿ ts'ondaa Macedonia na 'o na m'aⁿyo' ts'ondaa Acaya, machu' jla'jndaa'ndyo' na nntei'jndei'yo'. Ndo' majndye nn'aⁿ ts'ondaa Macedonia mati ñe'catei'jndeiina nc'e 'o jeeⁿ queeⁿ n'om'yo' ñ'oom'ñeeⁿ. ³ Saa meiiⁿ na luaa', majñooⁿya naⁿm'aⁿ na nnc'oona na m'aⁿyo' cha ticats'aana' na tiyuu' ñ'oom ya na jnda tsjooya cantyja 'naⁿyo', cha na c'omc'eendyo' cha'xeⁿ na jnda tsjoo ndaana. ⁴ Ee quia na nntsquiaaya na m'aⁿyo' ñequio nn'aⁿ Macedonia na nnc'oo ñ'eⁿndyô, ndo' xeⁿ nleitquioo' na tic'omc'eendyo' ñequio s'om'ñeeⁿ, jeeⁿ t'maⁿ nlui'jnaaⁿndyô, ndo' mati 'o. ⁵ Nc'e na ljo' matsona' na caⁿa ndaa nn'aaⁿya nmeiiⁿ na nnc'oojndyeena na m'aⁿyo' na nla'candaⁿndyo' s'ommeiⁿ na jnda jndu'yo' na ñnequia'yo'. Ndo' na luaa', joo s'ommeiⁿ cwiñnequia'yo' joona' ñequio na xcwee' n'om'yo', nchii cwe' na jndei' ndyuaayâ.

⁶ Saa cjaañjoom'ya n'om'yo' ñ'oomwaa na cwe' tjañoom': Juu ts'aⁿ na tijndye tsjaaⁿ manom', tit'maⁿ nntseiwe. Saa ts'aⁿ na maya tsjaaⁿ manom', majndyeti nntseiwe. ⁷ Quia jo' cwii cwiindyo' 'o catseitiuu cwanti na ñnequiaa na nntei'jndei ts'iaaⁿwaa'. Nchii ñnequiaa ñequio najndei'na' oo na tixcwee' ts'om, ee cjaawee' ntyjii Ty'ooots'om nn'aⁿ na cwiñnequia 'naⁿ na waa luee ñequio na jnda nquiuna jom. ⁸ Ee jom candaⁿya ndaa ñnequiaaⁿ cha'tso na macaⁿna' 'o hasta waljoo'cheⁿ na nleil'uee'ndyo', ndo' mati ndaa nntei'jndei'yo' nt'omcheⁿ. ⁹ Cha'xeⁿ ñ'oom' Ty'ooots'om na teiljeii na matsona':

Ty'oots'om ñequio na xcwee' ts'oom mateix'eeⁿ nn'aⁿ na nty'iaandye, Cha'tso na maty'iomyana' na matseixmaaⁿ, m'aaⁿ ndo' m'aaⁿna'.

¹⁰ Jo' chii nquii Ty'oots'om na mañequiaaⁿ tsjaaⁿ na nnom' ts'aⁿ, ndo' na cwiwe' ntjom cha niom na lcwa' ts'aⁿ, ñequiaaⁿ na nleil'uee'ndyo' ndo' nleijndyena' cha nndaā nnteijndei'yo' nt'omcheⁿ nn'aⁿ na macaⁿna' joona. ¹¹ Ndo' na luaa', nleijndye 'naⁿyo' cha ñequio na xcwee' n'om'yo' nndaā nnteijndei'yo' nt'omcheⁿ nn'aⁿ. Ndo' quia na nntsañ'ooⁿyâ tsjo'ñjeeⁿ na cwiñequia'yo' nnts'aana' na joo nn'aⁿ na matseitjoona' ñequiana na quianl'uaa' Ty'oots'om. ¹² Ndo' na ljo' nl'a'yo', nchii macandā na matseijndaa'ñena' ljo' na macaⁿna' naⁿñeeⁿ, mati nla't'maaⁿndyena Ty'oots'om na nluena na quianl'uaaⁿaⁿ cantyja 'naⁿyo'. ¹³ Joona nla't'maaⁿndyena Ty'oots'om ee juu na cwhiteijndei'yo' joona m'moⁿna' ndaana na cwilacandaā'ndyo' chiuu cwit'mooⁿ ñ'oom naya 'naaⁿ Cristo. Ndo' mati nla't'maaⁿndyena jom na jeeⁿ xcwee' n'om'yo' na cwhiteijndei'yo' joona ndo' mati nt'omcheⁿ nn'aⁿ na cwila'yu'. ¹⁴ Ndo' nc'e na ljo', nnts'aana' na nla'neiⁿna nnom Ty'oots'om na catio'naaⁿñê 'o. Nnc'omna na jnda nquiuna 'o nc'e cantyja 'naaⁿ juu naya na matseixmaaⁿ, jo' na cwil'a'yo' naya joona. ¹⁵ Quial'uaa' Ty'oots'om ee jnda tquiaaⁿ cwii na jeeⁿ cajnda na cwicandaaya na tjaa'naⁿ ñ'oom na nndaā nlanaāⁿya na nleixcwe na m'moⁿna' na ljo'.

Nc'e cwiluiñe Pablo apóstol, waa najndei na matseixmaaⁿ

10 ¹ Ja Pablo, nc'e Cristo m'aaⁿ na candya' ts'oom jaa ndo' t'maⁿ ts'oom ñ'eⁿndyo waa na mats'aa ty'oo ndaa'yo'. Ee waa ñ'oom quia na m'aaⁿya ñ'eⁿndyo', jeeⁿ niroom' ts'ooⁿ saa quia na tquia m'aaⁿya ñ'eⁿndyo', jeeⁿ s'andyo. ² Macaⁿa cwii naya'ñeeⁿ ndaa'yo' quia na jnda tuannda'a na m'aⁿyo', nt'omndyo' 'o na cwindu'yo' na mats'aa cha'xeⁿ cwil'a nn'aⁿ na tyoola'yu', til'a'yo' na nlcaⁿna' na nntseijndei' 'ndyo nacjo'yo'. Ee quia na jnda mam'aaⁿ quii'ntaaⁿyo' nliu'yo' na ti'maaⁿ ts'ooⁿ na nntseijndei' 'ndyo nacjoo naⁿñeeⁿ. ³ Ee meiiⁿ na laxmaaⁿyâ cha'xeⁿ nt'omcheⁿ nn'aⁿ saa tiquila'jndaayâ cha'xeⁿ cwil'a joona na cwila'jndana na cala'jomndye nn'aⁿ ñequio ñ'oom na cwiñequiana. ⁴ Ee l'o ts'iaaⁿ na cwiwil'uee'ndyô cha catyuii' ts'iaaⁿtyeⁿ na matseijndaa'ñe tsaⁿjndii tila'xmaⁿna' cha'xeⁿ joo na cwiwil'uee'ndye nt'omcheⁿ nn'aⁿ. Juu najndei na cwiluiñe Ty'oots'om, tseixmaⁿna' l'o ts'iaaⁿ 'naaⁿyâ na nntseityuii'na' najndei na matseixmaⁿ tsaⁿjndii. ⁵ Ñequio najndei na matseixmaⁿ Ty'oots'om cwila'tyuii'â cha'tso ñ'oom na jndo' n'om nn'aⁿ na cwi'oo nacjoom'm. Ndo' mati meiⁿquia na matseit'maaⁿñe cheⁿnquii ts'aⁿ, na juu jo' matseitsaaⁿñena' na nntsei'noⁿ ts'aⁿ cantyja 'naaⁿaⁿ. Cha'tso cantyja na matseituu ts'aⁿ, mats'aa na cju'cjena' juu jo' cantyja 'naaⁿ Cristo, cha catseicandaā'ñe ts'aⁿ jo nnoom. ⁶ Ndo' quia na jnda macwila'candaā'ndyo'ñ'eⁿyo', m'aⁿc'aayâ na nnta'wii'a meiⁿquia nn'aⁿ na cwila'wendye nacjooyâ.

⁷ 'O macandā cwe' ljo' na cwiwitquioo', jo' cwiitjei'yo' cwentā. Mei'ñee'che' 'o na macwji' cwentā na m'aa'ñe cantyja 'naa' Cristo, matsona' na cwji'ya tsa'ñee' cwentā na mati jā majo' la'xmaa'yā. ⁸ Mei' ticats'aana' na tia ntyjii na matseijndei' 'ndyo naquii' ts'iaa' na matseixma'ya na ty'iom Ty'oots'om ja. Ee tquiaa' na matseixma'ya na ljo' cha nnteijndeiina' na nntsanajnda'yo' cantyja 'naa'a', nchii cha nlco'wi'na' 'o. ⁹ Mei' ticatsona' na cwiindyō' 'o nnc'oom' ts'om na matseiljeiya cartamei' cwe' cha catseicaty'uena' juu. ¹⁰ Waa ñ'oom na cwilue nt'om nc'iaa'yo' na matseiteincuu'ndyo ndo' na jee' jnda ñ'oom cho carta 'na'ya. Mati cwiluena quia mawā na m'a'yo' quia jo' cwiwitquioo' na ja ts'a' na mei' cwe' ti'naa'to mei' ti'na'ya na nntseichu'a ñ'oom. ¹¹ Nquii ts'a' na luaa' m'aa' ts'om, catsei'noo'o' quia na jnda mam'a'tjoo'a mati mañe'cwii xje' nnts'aa cha'xje' ñ'oom na teiljeii cjoo' cartawaañe.

¹² Tquie nn'a' quii'ntaa'yo' na jee' nei'ncoo' ñ'oom cwila'nei'na ndaa'yo' cantyja 'naa' chiuu cwila'xma' nquieena. Jā xocal'aayā na ljo'. Laxma'na nn'a' na cwe' cwil'ato quia na cwiitjeii' che'nquieena cwentā cantyja 'naa'na ñequio chiuu cwi'oom'a' nt'omche' nc'iaana. ¹³ Saa tixocwinoo'ā na nla't'maa'ndyo che'ncjooyā cantyja 'naa' ts'iaa' na laxmaa'yā. Jā ñequii'che' nlanāa'yā cantyjati na matseijndaa'ñe Ty'oots'om ee jom tquiaa' na squia'cañooyā 'o na m'a'yo' tsjoom Corinto. ¹⁴ Jo' chii quia cwil'uuyā na Ty'oots'om ty'iroom ts'iaa' jā na cala'candiiyā 'o cantyja 'naa' Cristo, tyoowinoo'ā meii' na wanaa' na nla't'maa'ndyo che'ncjooyā. Ee majā squia'cañoo'jndyaayā 'o ñequio ñ'oom naya'ñee'. ¹⁵ Mei' tixocal'uuyā na cwentā jā ts'iaa' na jnda mach'ee cwiiche'. Jā wandyo' cwil'aayā. Cwicantyyaa' n'oo'yā na juu na cwilayu'ya n'om'yo' ñ'e' Ty'oots'om, nleit'ma'tina' cha' cantyja 'naa' jo' nncjaawit'ma'ti ts'iaa' 'naa'a' na cwil'aayā quii'ntaa'yo', saa na nluii naljo' cha'xje' na matseijndaa'ñe. ¹⁶ Quia jo' nnda nntsañ'oo'yā ñ'oom naya 'naa'a' ndaa' nn'a' na tquiati m'a'na ñequio tsjom'yo' yuu na tyoondyena juuna'. Ee naljo' nntseitsaa'ñena' na l'uuyā na ts'iaa' na mach'ee cwiiche' ts'a' tseixma'na' ts'iaa' na l'aa jā.

¹⁷ Jo' chii ts'a' na ñe'catseit'maa'ñe che'nquii, catseit'maa'ñe cantyja na mach'ee Ty'oots'om ñ'e'ñe. ¹⁸ Ee nchii matseit'maa'ñena' ts'a' quia na matseijndei' che'nquii na jee' cwijaacanjoom' cantyja 'naa'. Matseit'maa'ñena' juu quia na macjaawee' ntyjii Ty'oots'om ñ'e'ñe.

M'a' nn'a' na tiyuu' na cwiluiindyena apóstoles

11 ¹ Toom cwe' na nnc'omt'maa'ndyo' n'om'yo' ñ'e'ndyo na nntseina' cha'xje' ts'a' na cwe' matseinei'to. Cwa, cal'a'yo' na ljo'. ² Ee m'aa'ya na xuaya 'o cha'xje' nquii Ty'oots'om m'aa' na xuee' 'o. Ee seijndaa'ndyo ñomca 'na'yo' ñequio nquii Cristo. Ndo' ñe'catiooya 'o l'oo' na nla'xma'yo' cha'cwijom cwii yuscundyua na

tyoom'aaⁿ ñ'eⁿ tsaⁿs'a. ³ Eva tquii'nn'aⁿ catsuu jom cantyja na jndō' ts'omyo'. Mati macat'ua na joo ñomtiuu 'naⁿ'yo' nnquiu'nn'aⁿna' 'o, nnts'aana' na nla'tquiōō'ndyo' ñequio na xcwe c'oom ts'aⁿ na candya' ts'om Cristo. ⁴ Ee 'o cwiljoya n'om'yo' ñ'eⁿ nn'aⁿ na cwe' cwiquieya na m'aⁿ'yo' na cwila'neiⁿna ndaa'yo' cantyja 'naaⁿ' cwiicheⁿ Jesús, tanchii nquii Jesús na tyoñequiaayâ ñ'oom' ndaa'yo'. Ndo' wandyo' espírtu na cwito'ñoom'yo', tanchii nquii Espíritu Santo na to'ñoom'yo'. Ñ'oom na cwiñequia naⁿñeeⁿ cantyja chiuu na nlui'n'maaⁿñe añmaaⁿ' ts'aⁿ, wandyo' juuna' ñequio ñ'oom na tyoñequiaayâ ndaa'yo'. ⁵ Naⁿñeeⁿ na cwiquie'cañom 'o na cwiluena na joona cwiluiindyena apóstoles na tjacantyja, saa meiⁿchjoo ticats'aana' ntyjii na cjeti matseixmaⁿya ñ'eⁿndye joona. ⁶ Ee meiiⁿ na aa ti'naⁿya na ya nntseinchu'a ñ'oom cha'xjeⁿ joona, saa xcweya ñ'oom mantyjiiya cantyja 'naaⁿ' Jesucristo ndo' juu jo' jndā t'mōō'ndyeyuuyâ ndaa'yo' cantyjati cha'tso na tyol'aayâ.

⁷ Tîcwantjōⁿya na tyoñequiaaya ñ'oom naya 'naaⁿ' Ty'ōōts'om ndaa'yo', ndo' nc'e na ljo' áaa mach'eena' ndoo' nquiu'yo' na jeeⁿ seitjōōndyo ndaa'yo' na tju'ndyocjā cha nluiit'maⁿndyo' 'o? ⁸ Nt'omcheⁿ ntmaaⁿ' nn'aⁿ na macwji' Ty'ōōts'om cwentaaⁿ'aⁿ tquiana s'om na tcaⁿna' ja. S'om'ñeeⁿ teil'uee'ndyo cha nndaa ndi'ntjōⁿya ndaa'yo'. ⁹ Xjeⁿ na ñet'ōōⁿya quii'ntaaⁿ'yo' ndo' na ñeseitjōōna' ja, tîcju'a xuu nacjo'yo'. Ee nn'aⁿ na cwila'yu' na m'aaⁿ Macedonia tquiecanomna ja, tquiana s'om na seitjōōna' ja. Na cha'tsoñ'eⁿ seijndo na tîcatioō xuu nacjo'yo', ndo' ñecwitco na nnts'aa na ljo'. ¹⁰ Cha'xjeⁿ ñ'oom na mayuu' cantyja 'naaⁿ' Cristo m'aaⁿna' ñ'eⁿndyo, jo' chii meiⁿcwii ts'aⁿ ts'ōndaa Acaya xonndaa nnts'aa na nntseitsaaⁿñe na macwji's'andyo' na neiⁿya na mats'aa naljo'. ¹¹ Ndo' na luaa' matsjōō, áaa nla'tiuuto'yo' na tiwi' ts'ōōⁿya 'o? Mantyjiiicheⁿ Ty'ōōts'om na wi' ts'ōōⁿya 'o.

¹² Saa xuee na cwiwjaatina' jots'aa cha'xjeⁿ jndā ñes'aa cha nntseitsaaⁿñena' na nntjeii's'andye cheⁿnquiee naⁿñeeⁿ na cwiluena na ljo'yu cwil'ana ts'iaaⁿ 'naaⁿ' Ty'ōōts'om cha'xjeⁿ na cwil'aayâ. ¹³ Ee na'm'aⁿ' nchaal'uuyuu' na apóstoles joona, la'xmaⁿna nn'aⁿ na cwe' cwinquio'nn'aⁿ. Joona cwe' cwil'ayana na cwiluiindyena nn'aⁿ na cwindyentjom nnom Cristo. ¹⁴ Meiⁿ ticats'aana' na jeeⁿ m'aaⁿ' n'om'yo' na nmeiⁿ' cwil'ana ee mati Satanás mach'eeyaaⁿ na cwiluiñê cwii ángel na caxueeñe. ¹⁵ Nc'e na luaa' ts'oom, mati nn'aⁿ na cwindye'ntjom nnoom, cwe' cwil'ayana na m'aⁿna cantyja na maty'iomyana', saa na macandā nnt'uiityeⁿna' joona cantyjati na jndā ñel'ana.

Nc'e na cwiluiñe Pablo apóstol, jndye nawi' teinoom

¹⁶ Matsjōōnda'a tila'tiuu'yo' na ja ntjeiⁿndyo, saa xeⁿ na ljo' cwil'a'yo', quiandyo' na nntseinaⁿ cha'na ts'aⁿ na ntjeiⁿñe cha nncju'naaⁿñena' na nncwji's'andyo cantyja 'naⁿya. ¹⁷ Ñ'oom na matsjōō,

nchii ñ'oom na sa'ntjom Ta Jesús na catsjooya. Cwe' na matsjoo nncō ee mat'uiina' cantyja na macwji's'andyo. ¹⁸ Nc'e jndye nn'aⁿ m'aⁿ na cwitjeii's'andye cha'na cwil'a nn'aⁿ tsjoomnancue, mati ja nncwji's'andyo cantyja 'naⁿya. ¹⁹ Ndoo' nquiu'yo' na jeeⁿ jndō' n'om'yo' ee na cwindye'yo' ñ'oom na cwiñequia na'ntjei'm'aⁿ. ²⁰ Ee cwiljoya n'om'yo' quia cwil'a na'ñeeⁿ na cwindye'ntjom'tyeⁿyo' ndaana, quia cwitjeii'na 'naⁿyo', ndo' quia cwitmeii'na nda'watmeiⁿ ndaa'yo'. ²¹ Meiiⁿ na jeeⁿ jnaaⁿa na nntsjoō na ljo', saa tileic'oⁿ t'maaⁿndyō n'ooⁿyâ na nl'aayâ cha'xjeⁿ cwil'a na'ñeeⁿ.

Meiiⁿ na matseinaⁿya cha'na ts'aⁿ na jnda teintjeiⁿñe, saa yuu na wanaaⁿ na cwila't'maaⁿndye na'ñeeⁿ, mati wanaaⁿ na ljo' nnts'aa ja. ²² Joona, ¿aa cwiluiindyena nn'aⁿ hebreos? Mati ja majo' cwiluiindyō. ¿Aa nn'aⁿ na jndyowicantyjoō' tsjaaⁿ Israel joona? Mati majo' ja. ¿aa tsjaaⁿ Abraham na jndyowicantyjoō' joona? Majo' ja. ²³ Joona, ¿aa cwiluiindyena nn'aⁿ na cwindye'ntjom nnom Cristo? Ntyjii na matseinaⁿ cha'na ts'aⁿ na ntjeiⁿñe, saa ja t'maⁿti ts'iaaⁿñeeⁿ mats'aa, nchiiti joona. Majndyeti ndii' jla'sei' nn'aⁿ ja jnaaⁿ na mañequiaya ñ'oom' Ty'oōts'om. Jndyeti ndii' tuee' nn'aⁿ ja w'aancjo nc'e na mandi'ntjoⁿya nnom Cristo. Ndo' jndye ndii' waa na teincuu' na nntseicuee'na' ja. ²⁴ 'Om ndii' tyola'sei' nn'aⁿ judíos ja na cwii cwii ndii' na l'ana na ljo', ntquiuunchoo'nqui waljoo' ñjeiiⁿ ndii' tioona 'naⁿ ja. ²⁵ Ndyee ndii' tyotjaa' nn'aⁿ romanos ja ñ'eⁿ n'ooml'eii. Cwii ndii' tyotmeiiⁿ nn'aⁿ ljo' ja. Ndo' ndyee ndii' seijomna' na tyuii' w'aandaa xjeⁿ na wa'ñjooⁿya ts'om ndaaluee. Cwii ndii' tyowantyjo nnom ndaaluee meiⁿchaa' xuee ndo' meiⁿchaa' tsjom. ²⁶ Na jndye joo manooⁿya ts'iaaⁿ 'naaⁿ Ty'oōts'om, jndye ndii' maco'wi'na' ja na cwicwjee' jndaa. Ndo' mati teincuu' quia na matjomndyo naⁿcanty'ue. Quia waa nquiee nn'aⁿya nn'aⁿ judíos cwil'ana na teincuu' m'aaⁿya, ndo' quia waa majo'ti cwil'a nn'aⁿ na nchii judíos. Quiju'na' na waa na teincuu' cjoya naquii' njoom, ndo' mati jo ndo' jndaa. Quia waa teincuu' m'aaⁿna' na mawity'ioya ndaaluee, ndo' mati quii'ntaaⁿ nn'aⁿ na cwe' cwil'aya na cwila'yu'. ²⁷ Quia waa na matseicwejndyaa'ndyōñ'aⁿ naquii' ts'iaaⁿ 'naaⁿ Ty'oōts'om. Quia waa maquiina' ja ndo' macwji'na' tsaⁿtsjom nooⁿ. Majndye ndii' m'aaⁿya na tileicaljeiya ljo' na nlquiaaya ndo' na jaa' m'aaⁿna' na ñec'ua ndaa. Ndo' jndye ndii' mawejndo'a. Quia waa teiⁿ m'aaⁿya na matseitjoona' liaa na nlcwaya.

²⁸ Ndo' wandyo' nmeiⁿ, 'io ndii' 'io jaawa jaacue na m'aaⁿ m'aaⁿ ts'oōⁿ cantyja 'naaⁿ cwii cwii tmaaⁿ nn'aⁿ na macwji' Ty'oōts'om cwentaaⁿaⁿ. ²⁹ Ee quia na m'aaⁿ ts'aⁿ na tijndeii' ts'oom cantyja na matseyoom'm mati mach'eena' na tijndo cantyja na matseyu'a. Quia na cwinajndeii' jnaⁿ ñ'eⁿ cwii nn'aⁿya na matseyu', matjoⁿ na jnaaⁿa ndo' matseiloo'ndyo. ³⁰ Xeⁿ macaⁿna' na nntseit'maaⁿndyo cheⁿnncō, nntseinaⁿya cantyja 'naaⁿ joo na cwit'mooⁿna' na ticwi'naⁿya. ³¹ Nquii

Ty'oots'om na cwiluiñê Tsotye Ta Jesucristo cwentaaya, mantyjeeⁿ na matseinaⁿya ñ'oom na mayuu'. ³² Quia ñet'ooⁿya tsjoom Damasco, nquii Aretas tyom'aaⁿ gobiernom. Jom ty'ioom ts'iaaⁿ cwii ts'aⁿ Damasco na sa'ntjom na cat'ue sondaro ja xjeⁿ na jocaluii'a 'ndyoots'a nnom tsjoom'ñeeⁿ. ³³ Saa jla'c'oⁿ nn'aⁿ ja cwii mantana tatsiaⁿ nnom tsjoom na wa'njo^oya cwii tsquieel'oo. Ndo' laa'ti' jlui'n'maaⁿndyo naquii' l'o tsaⁿmaⁿts'iaaⁿñeeⁿ.

'Naaⁿ na tco'na' nnom Pablo

12 ¹ Tjaa'naⁿ naya 'naaⁿ ts'aⁿ na macwji's'añe cheⁿnquii, saa nntseinaⁿtya cantyja 'naaⁿ joo na tco'na' no^o ñ'eⁿ joo ñ'oom na t'moⁿ Ta Jesucristo no^o. ² Wajnaⁿa cwii ts'aⁿ na matseyu' ñ'eⁿ Cristo. Jndaⁿ canchoo'ñequiee chu na tjañ'oom Ty'oots'om tsaⁿñeeⁿ cañoom'luee na jnda ndyee. Aa ndiñ'eⁿ seiⁿeⁿ oo aa ticañ'eⁿ, jo' ticaljeii, Ty'oots'om ntyjii. ³ Ntyjiiya na tja tsaⁿñeeⁿ jo' jo', ¿aa ndiñ'eⁿ seiⁿeⁿ oo aa ticañ'eⁿ? jo' ticaljeii, Ty'oots'om ntyjii, ⁴ saa tjañ'oomna' tsaⁿñeeⁿ paraíso yuu na m'aaⁿ nquii Ty'oots'om. Jo' jo' jndii tsaⁿñeeⁿ ñ'oom na cwe' wanty'iuu' m'aaⁿna' na ticwanaaⁿ na nntseiteincoo' ts'aⁿ joona'. ⁵ Nndaⁿ nntseit'maaⁿndyo cantyja 'naaⁿ cwii ts'aⁿ cha'na tsaⁿñeeⁿ, saa cantyja 'naⁿya tixotseit'maaⁿndyo, macandaⁿ nntseit'maaⁿndyo cantyja 'naaⁿ joo na cwit'mooⁿna' na ticwi'naⁿya. ⁶ Meiiⁿ xeⁿ na nntseit'maaⁿndyo cantyja 'naⁿya, tixocats'aana' na tseixmaⁿya cha'xjeⁿ ts'aⁿ na meiⁿ cwe' tijndo'to ts'om ee ñ'oom na mayuu' matseinaⁿ, saa tixocats'aa na ljo', cha titseituu ts'aⁿ na t'maⁿ cwiluiindy^o, nchiiti cantyja na cwindyena na matseinaⁿ oo na mats'aa. ⁷ Joo nmeiⁿ na tco'na' no^o na jeeⁿ t'maⁿ la'xmaⁿna', cha nntseicu'na' na nntseis'andy^o na cwii nnom na nty'ia, nc'e jo' jnaⁿna' na tyoquiina' ja cha'cwijom ndii' tsioom quii' seiⁿeⁿ ts'aⁿ, luaa' s'aa Satanás cha co'wi'na' ja. ⁸ Ndyee ndii' tcaaⁿa nnom Ta Jesús na cwjeeⁿeⁿ juu nawi'ñeeⁿ. ⁹ Saa nqueⁿ tsoom no^o: “Juu naya na matseixmaⁿya, macwiiwijndeiina' cantyjati na macaⁿna' 'u, ee t'maⁿti cwiwitquiao' juu najndo quia na mateijndeiya ts'aⁿ yuu na tileicandaⁿ nnts'aaⁿ.” Luaa' tsoom. Jo' chii m'aaⁿya na neiⁿya ndo' matseit'maaⁿndyo meiiⁿ na nquiu nn'aⁿ na cje mats'aa, cha juu najndei na cwiluiñe Cristo nleitquiao' na m'aaⁿna' ñ'eⁿndyo. ¹⁰ Jo' chii m'aaⁿya na neiⁿya meiiⁿ na cje mats'aa, meiiⁿ cwila'jnaaⁿ nn'aⁿ ja, meiiⁿ na matseitjoona' na nleil'uee'ndyo, meiiⁿ cwintyo nn'aⁿ ja, ñequio joo na wi' na mawino^oya nc'e na cwiluiindy^o cwentaa' Cristo. Ee quia na majucjena' ja, saa cantyja 'naaⁿaⁿ m'aaⁿya najndo.

M'aaⁿ ts'om Pablo cantyja 'naaⁿ nn'aⁿ Corinto na cwila'yu'

¹¹ Na nmeiⁿ matseinaⁿya, maty'iomna' cantyja 'naⁿya na tseixmaⁿya ts'aⁿ na tijndo'to ts'om saa 'o cwil'a'yo' najndei'na' na catsjooya na ljo'.

Ee matsona' na 'o ya ñ'loom nntjei'yuun'ndyo' cantyja 'na'ya. Ee meii' ja tit'ma' cwiluiindyō saa tjaa'na' cwii nnom na tit'ma' tseixma'ya ñequio joo apóstoles na cwindu'yo' na jee' t'ma' cwiluiindyē. ¹² Quia na tyom'aa'ya quii'ntaa'yo', tyom'aa' niomcha'ya xje' na teil'uee'ñe Ty'oōts'om ja na tyoch'ee' 'naa' ñequio ts'iaa' t'ma' na tixocaluiina' cantyja najndei nquii ts'a', niom ts'iaa' na tuii na tquiaana' na tyojaawee' n'om'yo' ndo' cha'tso nmei' tyot'moō'ndyeyuna' na cwiluiindyō apóstol quii'ntaa'yo'.

¹³ Cantyja 'na'yo' ñequio nt'omche ntmaa' nn'a' na macwji' Ty'oōts'om cwentaa'a', ñecwii xje' mats'aaya ñ'e'ndyo' cha'xje' ñequio joona. Macandā tīca'a' na catei'xe'yo' ja. Calat'ma' n'om'yo' ja na mach'eena' nquiu'yo' na cantyja 'naa' jo' seitjoōndyō ndaa'yo'.

¹⁴ Je' matseijndaa'ndyō na nnda' ndyee ndii' na majocandoō'nnda'a 'o. Mei' xoca'a' na nntei'xe'yo' ja ee nchii mal'uaya 'na'yo', mal'uaya na 'o ncwantjō'ya ee matsona' na nquiee tquie nn'a' nla'catsuundyena cwentaa' ndana, nchii ndana nnteix'ee joona. ¹⁵ Ndo' ñequio na xcwee'ya ts'oō' hasta meii' na nntseicatsuuya cha'tso na matseixma'ya, mati meii' cha'waa cantyja 'na'ya cha na nnteijndeiina' añmaa'yo'. Ndo' nnts'aa naljo' meii' 'o ticajnda nquiu'yo' ja saa ja t'ma' wi'ts'oō'ya 'o.

¹⁶ Tīcatioō xuu 'o na catei'xe'yo' ja, saa nt'omndyo' 'o cwitjei'yo' cwenta na ta'ntjō'ya 'o ñequio cwii na tquiu'nn'a'na' 'o cha'cwijom tyuu'ndyo' ñ'e' cwii tei'co'. ¹⁷ ¿Aa nnts'aache'na' cwitjei'yo' cwenta na tquiu'nn'a'ya 'o ñequio cwii nn'a'ya na jñōō'ya na m'a'yo'? ¹⁸ Tcaa'a' nnom Tito na cjacanty'iaa'a' 'o ndo' jñōō'ya cwiiche' nn'aa'ya na matseyu' ñ'e'ñê. ¿Aa nnts'aache'na' na tquiu'nn'a' Tito 'o? ¿Aa tiyuu' na wendyô ñecwii xje' m'aa' n'oō'nyâ?

¹⁹ Nndaā nnts'aana' na cwila'tiuu'yo' cwe' na jee' cwila'cajñoom'ndyô ndaa'yo' saa tiyuu' naljo'. Cantyja 'naa' ñ'loomwaa', wandyo' waana', ee ntyjii Ty'oōts'om ñ'loom na cwilanaā'nyâ ndaa'yo' ndo' na cwila'xmaa'nyâ cwentaa' Cristo. Jo' chii 'o nn'a'ya na jee' wi' ts'oō'ya, cwil'aayâ na ljo' cha nnteijndeiina' 'o na nntsanaajnda'yo'. ²⁰ Ee macaty'uā xe' na nncuācañōō'nnda'a 'o nndaā nnts'aana' na xocaljeiya 'o cha'xje' na ntyjaa' ts'oō', meii' 'o xocaliu'yo' ja cha'xje' na ntyjaa' n'om'yo'. Nquiaya na nljeiya na cwila'ntja'ndyo', na cwila'tāa' n'om'yo' nc'iaa'yo', cwilawjee'yo' joona, cwitjei'ya'ndyo' che'ncjo'yo', ndo' cwilanei'yo' cantu nacjoona, na cwitio'ñ'oom'yo' joona, na cwitjei's'andyo', cwitjei'lcundyo' che'ncjo'yo' ndo' na tixcwe m'a'yo' cha'xje' matsona' na c'om'yo'. ²¹ Matseicaty'uena' ja quia na ncuācañōō'nnda'a 'o, nquii Ty'oōts'omya nnts'aa' na nlui'jnaa'ndyō quii'ntaa'yo' ndo' na nntseity'ioona' ja cantyja 'naa' jndyendyo' 'o na jaach'ee xuee cwila'tjoōndyo' nnoom meii' tyoolcwe' n'om'yo' jna'yo', na tilju' tsaam'a'yo' jo nnoom, na ndicwa' cwim'a'ya'yo' ñequio nn'a' ndo' na cwila'quee' n'om'yo' chiuu tseixma' tsjoomnancue.

Ñ'oom na macandā na matseijndō' Pablo n'omna

13 ¹ Je' jndā ndyee ndii' na majocandōō'a 'o. Ñ'oom' Ty'oots'om na teiljeii matsona' quia na m'aⁿ we ndyee nn'aⁿ na manquiujndaa'ndye cwii nnom na matsei'tjooñe ts'aⁿ, maxjeⁿ nnt'uiityeⁿna' tsaⁿñeeⁿ. ² Quia na ñet'ooⁿya ñ'eⁿndyo' na jndā we tsjoōya na xoc'ooⁿya na t'maⁿ ts'ooⁿya ñequio nn'aⁿ na ndicwaⁿ cwila'tjooⁿndye. Je' cwi'tjoocheⁿ na nncuandā'a na m'aⁿyo', mañejuu ñ'oom'ñeeⁿ matsjoo tixoc'ooⁿ na t'maⁿ ts'ooⁿ ñequio naⁿñeeⁿ, ³ ee 'o cwil'ue'yo' cwii na ma'moⁿna' quia matseinaⁿya ndāa'yo', matseineiⁿ nquii Cristo. Ee quii'ntaaⁿyo' nchii cwiluiiñê na tijneiⁿ na nnt'ueiiⁿ 'o. Nqueⁿ waa najneiⁿ quii'ntaaⁿyo'. ⁴ Ñ'oom na mayuu' na ty'ioom nn'aⁿ jom ts'oom'naaⁿ cha'cwijom ts'aⁿ na tijndeii matseixmaⁿ, saa wanoom'm nc'e najndeii na cwiluiiñe Ty'oots'om, ndo' mati jā na cwilajomndyô cantyja na tijndeii ñeseixmaaⁿ, cha nc'e jo', mati nntandōō'â ñ'eⁿñê nc'e najndeii na matseixmaⁿ Ty'oots'om cha nnteijndeiiina' 'o.

⁵ Catjei' cheⁿncjo'yo' cwenta aa xcwee' n'om'yo' jo nnom Ty'oots'om, cha nleitquioo' áaa cwila'yu'ya n'om'yo' ñ'eⁿñê? Queⁿya'yo' cwenta cantyja 'naaⁿyo'. Xeⁿ leiqueⁿyo' cwenta na m'aaⁿ Jesucristo quii' n'om'yo' quia jo' áaa chii ma'moⁿna' na cwiluiindyō nn'aⁿ na cwe' cwila'yu'to? ⁶ Saa ntyjaa'ya cwii ts'ooⁿya na nla'noⁿyo' na jā nchii cwila'xmaaⁿyâ nn'aⁿ na cwe' cwila'yu'to. ⁷ Cwitaⁿyâ nnom Ty'oots'om na til'a'yo' 'naⁿ natia, nchii cwil'uuyâ naljo' cha nleitquioo' na jā jlui'yaayâ jo', cwil'uuyâ cha nl'a'yo' 'naⁿ na maty'iomyana'. Tints'aa meiiⁿ 'o cwi'tjei'yo' cwenta na tixcwe cwil'aayâ. ⁸ Ee xocandā nntsaayâ nacjoo' ñ'oom na cwiluiiñena' na mayuu'. Ñequii'cheⁿ cwilajomndyô cantyja 'naaⁿ juuna'. ⁹ M'aaⁿyâ na neiiⁿyâ quia na laxmaaⁿyâ na tijndaayâ cha na m'moⁿna' na 'o laxmaⁿyo' na jndā'yo' cantyja 'naaⁿ Cristo. Ñecwitco cwitaⁿyâ na nlaxmaⁿyo' na candāa'ndyo' jo nnom Ty'oots'om. ¹⁰ Waa najndeii na matseixmaⁿ Cristo na juu jo' mañequiaaⁿ na matseixmaⁿya cha cateijndeiiina' 'o na nntsanajnda'yo' cantyja 'naaⁿaⁿ, nchii cha na catseyuii'na' na cwiluiindyō cwentaaⁿaⁿ. Matseiljeiya cartawaañe na nnto'ñoom'yo' cha quia na jndā tuaya quii'ntaaⁿyo', meiⁿ ticaⁿna' na nleil'uee'ndyō najndeii na matseixmaⁿya na cat'uiina' 'o.

Matseit'maaⁿñe Pablo Ty'oots'om

¹¹ Ñ'oom na macandā, 'o nn'aⁿya, c'om'yo' na neiⁿyo'. Calajnda'yo' na nla'xmaⁿyo' na candāa'ndyo' jo nnom Ty'oots'om. Quia'yo' na t'maⁿ n'om nc'iaa'yo'. C'om'yo' na ya nn'aⁿndyo' ñequio joona na tjaa'naⁿ tia' cacho'yo' ñ'eⁿndyena. Quia jo' nquii Ty'oots'om na m'aaⁿ na candya' ts'oom jaa ndo' na mañequiaaⁿ na tjaa ñomtiuu c'ooⁿya jo nnoom, nnc'oomñê ñ'eⁿndyo'. ¹² Cwii cwii x'iaa'yo' na matseyu' cataⁿyo' ts'ooⁿ

na cwiñequia'yo' na xmaⁿñê nc'e na jnda nquiu'yo' jom. ¹³ Cha'tsondye nn'aⁿ na m'aⁿ ñjaaⁿ na la'xmaⁿ cwentaa' Ty'o^oots'om cwila'cwanomna na xmaⁿndyo' 'o.

¹⁴ Juu naya na matseixmaⁿ Ta Jesucristo, ñequio juu na m'aaⁿ Ty'o^oots'om na candya' ts'oom jaa, ñequio nquii Espíritu Santo na m'aaⁿ naquii' n'o^oya, ñequii'cheⁿ cala'xmaⁿ'yo' cha'tso nmeiⁿ'. Amén.